

Pres Fondo Desaroyo Arubano Sr. Gerardo Oduber

Fondo Desaroyo Arubano a pone un suma di 14.6 miyon florin pa renobacion y ampliacion di edificio di corte



ORANJESTAD – E proyecto di renovacion y expansion di e edificio di corte di husticia di Aruba, ta un proyecto den cuadro di e programa di Nationale Veiligheidsplan 2008 pa 2012, cu ta wordo maneha pa FDA. Total den e programa aki tin un suma di 14.6 miyon reserva pa corte di husticia di Aruba. Tin diferente proyecto cu mester wordo ehecuta entre otro instalacion di 3 Nederlandse Schrijffjuristen y 1 P&O adviser gerechten, renobacion y ampliacion di e biblioteca huridico di corte, e sistema di alarma y admision pa e edificio, compra di cierto aparatonan electronico y medionan di comunicacion y naturalmente e renovacion y expansion di e edificio, den cuadro di esaki pais Aruba lo pone fondonan adicional pa completa e proyecto.

E architect encarga cu e proyecto lo ta na Hoevertsz Archidesign pa AWG 1.811.392,00 cu den cuadro di 38 siman lo mester keda cla cu e pinturanan y diseña y e bestek pa por cuminsa cu e construccion.

Desde su inicio di e sistema na aña 2002 te cu awe, Fondo Desaroyo Arubano a financia mas cu 300 proyecto contribuyendo na e desaroyo y bienestar di Pais Aruba pa un suma total di AWG 262 miyon. Tur e proyectonan cu a wordo ehecuta tabata un esfuerso conhunto di e departamentonan di gobierno, Directie Economische Zaken, Handel &

Industrie. Representante di Hulanda na Aruba(VNO), AIB Bank N.v y e directiva di FDA.

Nos ta orguyoso cu tur e relatonan annual di Fondo Desaroyo arubano for di aña 2000 te cu aña 2008 a wordo entrega na tempo na e paisnan. “donantenan”, Aruba y Hulanda cu un goedkeurende accountantsverklaring.

Manera ta conoci a base di e areglo actual, e aña aki(2009) lo ta e ultimo aña cu e paisnan (Aruba y Hulanda) lo deposita fondo den Fondo Desaroyo arubano pa ehecucion pa e proyectonan di e programanan di 2000 pa 2005 y di 2006 pa 2009. Minister di finanzas y Asuntonan Economico a anuncia e intencion di pais Aruba pa continua cu e manera di inversion aki, sea por medio di FDA mes of por medio di un fondo nobo. Probechando di e ocasion aki mi kier na nomber di directiva di FDA gradici pais Aruba, especialmente Minister di Finansa & Asuntonan Economico di Aruba, su excelencia sr. Nilo Swean, Minister di



Husticia, su excelencia sr. Rudy Croes y di Hulanda e Secretario di Estado pa Asuntonan Interno y relacionnan di reino Hulandes sra. Ank Bijeleveld a e confiansa deposita den FDA pa e ultimo 10 añanan. Finalmente na corte di Husticia, finalmente nan ta haya nan edificio.

Apesar cu Ministerio Publico a pidi pa e keda sera

Chu Rincones laga liber ayera merdia

ORANJESTAD – Ayera mainta Chu Rincones a presenta dilanti Hues Comisario y apesar cu Fiscal a pidi pa prolonga su detencion, Hues Comisario a ordena pa e wordo laga liber ayera merdia 12'or. E noticia aki a cay manera un banjo di awa frieu, en especial despues di anuncio di Minister di Husticia y tambe Procurador General di Aruba cu lo bay actua cu man duro contra esnan cu ta den posesion di arma ilegal. A fiha un periodo di gracia, caminda tur esnan cu tin arma ilegal por entrega esaki, sin e peligro cu nan lo wordo

persigui.

Den e caso di Chu Rincones, un ex agente di Polis cu sa masha bon encuanto posesion ilegal di arma di candela, a wordo deteni despues cu a haya un arma ilegal na su cas.

E incidente aki a wordo hopi cuestiona den comunidad y hasta e mandatario di Husticia a wordo cuestiona riba esaki. Net awor cu Procurador General a anuncia su maneho severo,

ta mira cu un ex agente di Polis cu a wordo haya cu un arma ilegal, ta wordo laga liber. Esaki ta laga un sabor amargo serca Ministerio Publico. Tempo lo muestra si Ministerio Publico lo apela e decision aki of ta simplemente tapa wowo y haci manera nada no a pasa.

Ta asina cu Ministerio Publico por apela y hopi biaha a yega di sosode cu e persona cu a wordo laga liber, ta wordo deteni bek. Lo bay sigui esaki di cerca.